



Sabtu, 06 Agustus 2022
Ogen: Esekiel 46:16-18



Aturen kerna Taneh



Taneh sada bagin si la terpersirangken ras kegeluhen. Dibata nepa manusia alu make taneh. Bas taneh nari turah me sinuan-sinuan si jadi pangan rubia-rubia ras manusia. I datas taneh me manusia majekken rumahna, janah arah taneh e nari me manusia encari (nuan-nuan) ras sidebanna. Alu kata sideban taneh enda mereken pasu-pasu kempak manusia.

Ngidah pentingna kerna taneh enda, bas ogen paksa tenengta wari enda si idah kerna perintah Dibata kerna taneh. Taneh e pemere Dibata kap man bangsana. Tep-tep suku bas bangsaNa enggo ibereken tanah (selain suku imam si ngeluh bas Rumah Pertoton). Pemere Dibata e barang pusaka janah arus ijaga. Guna kiniulin ibahan me aturen si jadi gelemen bangsa e. *"Adi raja sierkuasa mereken sada bagin tanehna man sekalak anakna si dilaki, taneh e enggo anak ndai empuna jadi sekerajangen keluargana. Tapi adi raja mereken sada bagin tanehna man sekalak pegawaina taneh e arus mulihka man raja adi Tahun Kemulihen enggo seh."* Aturen enda me si ngaturken kerna kecibal taneh. Taneh e la banci pindah si madasa. Kune ibereken man kalak sideban bas paksana arus mulihken, tujunna gelah ola sada pe bangsa Tuhan itindas alu muat taneh janah tetap ngeluh bas kiniersadan. Ieteh Tuhan maka taneh e banci erbahanca terjadi penindasan nandangi sada ras sidebanna. Keselamatan taneh e me keselamatan (kedamen) bangsa Tuhan. Bas budaya Karo pe ibahan aturen kerna taneh, maka si mada taneh e me sinursur. Tujun segelah identitas dingin kiniersadan jabu e tetap lit. Adi siperdiateken genduari, la sitik taneh enda jadi persoalen, perubaten piah dungna jadi penindasan pe. Kurang ngergaken taneh sinitadingken orang tua ndube ras sidebanna. Adi nulih kita ku bas pustaka ngatakan maka tahen enda guna tetap njaga kiniersadaan jabu/keluarga, e maka bagelah jadi pe man banta kerina.